

cher Vorstellung wehre/ weilen/ besag des Prediger Salomons/ in seines letzten Capitels. 12. vers. viel Bücher machens kein Ende: Dero menge auch grosse Vnruhe vnd Widerwertigkeit/ in Geist- vnd weltlichen Dingen anrichtete/ auch also/ daß gute Bücher sehr mißbrauchet/ vnd was zu nutzbahrem Ende/ von etlichen wolmeindlich hinterlassen/ von vielen zum Beyspiel vnd Politischen Lehrsätzen/ in ärgstem gezogen/ vnd gebraucht werden wollen: [](iij r] Wie solches die Erfahrung/ denē die etwas in weltlichen Händeln geübet/ Denē auch der von Weltweisen hochgehaltene/ Tacitus vnnd andere Politische Schrifften nicht vnbekandt/ genugsamb an die Hand gebe.

Zu deme vnd vornemblich wehre die Bibel an allerhand Lehren so reich/ daß/ wenn sie als *GOTTES* Wort (Theologicè) gelesen wird/ sie vns nicht allein/ vnnd zorderst in deme/ was zur seligmachenden Erkändtnis Christi/ ewigen Lebens Erlangung/ auch zu Erwerbung zeitlichen Wolfarth vnd Glückseligkeit nötig/ Vnterricht gnugsamb gebe; [](iij v] Sondern sie könne darzu noch sehr wol/ Weißheit liebhaberisch² (Philosophicè) Naturkündig³: (Phisicè) Sittenerisch⁴: (Ethicè) Geschichtschriftlich⁵: (Historicè) Weltwitzig⁶/ (Politicè) Höfflich⁷/ (Aulicè) Kriegsvnterrichtlich⁸/ (Polemicè) Rechtslerig⁹/ (Iuridicè) Artztisch¹⁰/ (Medicè) Haußhältisch¹¹/ (Oeconomicè) Bawkünstlich¹²/ (Architectonicè) Redengebkünstig¹³ (Dialecticè) Reimdichterisch¹⁴/ (Poeticè.) anders vnnd dergleichen mehrers zu geschweigen/ gantz nützlich gelesen/ vnnd von allem gute Belehrung/ darauß geschöpffet werden. [](iij r] Daß man also der menge Bücher/ die oft nur jrre machen/ wol ohn seyn/ vnd diese zu embsiger darin Nachforsch- vnd Betrachtung/ desto fleissiger vnd andächtiger lesen möchte. Auff solche eingeführete Vrsachen kam gemeiniglich die andere Frage; Warumb ich denn den Seneca vnd Epictetus allein außsetzete/ vnnd anderen Vorzüge? Darauff wurde wieder-antwortlich eingewandt/ Solches geschehe nicht darumb/ daß man vermeint etwas grössern Nachtrucks¹⁵ (ἐμφοσις majoris) viel weniger etwas mehrerer darin/ denn in Gottes Wort zu finden/ sondern deßwe- [](iij v] gen/ daß in Gegenhaltung der Bibel vnnd dieser/ daraus erhellete/ wie auch die Leute/ die allein mit dem Liecht der Natur erleucht/ so wol/ vnd gleichsamb Gottselig/ von vielen/ rechten Christen hochnötigen Tugenden/ Eigen- vnd Wissenschaften geredet vñ geschrieben: dardurch den sehr viel die sich Christen nennen/ das helle Liecht göttlichen Worts für sich haben/ vnd dennoch so wohl in der Wissenschaft solcher Dinge/ als in der Wirklichkeit/ jhnen bey weitem nicht gleich kommen/ beschämet/ vnnd wenn sie eine solche lieblich-lehrsamb-vnnd annehmliche Vbereinstimmung sehen/ zur Besse- [](v r] rung angereizt vnd angetrieben werden möchten.

Die dritte Frage oder Einwurff die folgete/ ware: Wenn kein Geschichtschreiber vorhanden/ wie man denn/ was in der Welt seithero vorgelauffen/ vnd von den Vorfahren löblich- vnd schändlichs vns zum Beyspiel/ theils der Nachfolg- theils der Vermeidung were verrichtet worden/ wissen könne? Darauff wurde abermal gebürend geantwort/ solche Bücher rechter Art/ in Warheits Korn vñ Schrot/ (wie man im Müntzwesen spricht) möchten nebst der heiligen Schrifft gantz wol gewünschet werden: Weilen aber [](v v] derselbē viel/ oft gen einander lieffen/ auch wol Mehrlein vnd vngegründte Sachen